

四庫全書

集部

# 欽定四庫全書

集部

御定歷代賦彙卷一百十三

詳校官檢討<sub>臣</sub>劉炘

主事銜<sub>臣</sub>徐以坤覆勘

總校官編修<sub>臣</sub>王燕緒

校對官中書<sub>臣</sub>潘曾起

謄錄監生<sub>臣</sub>鄧培善

欽定四庫全書

御定歷代賦彙卷一百十三

寓言

○ 草上之風賦

以君子之德風  
偃乎草為韻

唐

蔣防

草繇繇兮擢穎含薰風發發兮乍靡而分其取象也散  
芳馨於知己其為義也合政令於人君豈惟動之而委  
順抑亦播之而有聞觀其徜徉代起激拂無已轉絲蕙  
而影亂時光汎青蘋而文橫秋水浸淫翳蒼振奮蘭芷

颯然而動昔有過於荆王冷爾斯來今不乘於列子翻  
翁鬱轉歲蕤在芄芄而可翫觀習習而無遺被以幽深  
諒有條而有暢布乎原隰誠長之而養之或徐或疾順  
天作則大以抑其滋蔓細以蕩其幽默分乎萬彙盖吹  
萬以齊驅繫於一人誠畫一於同德不擇乎高下不棄  
乎幽蒙敷葉而重重偃翠翻花而灼灼駢紅連縣九野  
披靡千叢倚伏俟時小人之心猶草衰榮不問君子之  
德如風莽眇平皋悠揚茂苑風何草之不動草何風而

不偃飄杜衡而芳氣自遙歷蒿艾而清聲漸遠是知風  
為號令之類草為衆庶之徒方以俟其披拂固有適於  
榮枯立政則斯不大矣騰芳而孰不宜乎故觀其化者  
知神之造觀其風者知國之道將有宣於八方故寓形  
於蔓草仲尼以之而取譬宋玉由斯而奮藻雖異代而  
殊時竊取摭於懷抱

風偃草賦

以上之化人乃  
如是焉為韻

唐

羅立言

人之化兮從政之所向草之偃兮隨風之所仰大小覃

及道均乎廣敷高下必加義存乎溥暢將咸被於榮悴  
匪有阻於遐曠感之化靡自符於順柔動而悅隨豈因  
乎用壯如雲起於龍台若臣和於君唱豈蕭條衆芳之  
間翱翔激水之上而已美其抗威有制應物無私播生  
成於萬族順炎涼於四時彌岡坂而盡朴厯原隰而無  
遺颼颼其音時自南而自北扶疎其狀隨左之而右之  
汎蘭叢而影分丹穎轉蔥園而光搖碧滋有感而施不  
獨芄芄其麥觸類皆長寧遺楚楚者茨則知草之偃風

威之所藉人之理上政之所化不然則何以喻德君子  
比訓小人佐天地之化育助雷雨於陶鈞當槁葉辭條  
我則激淒清於霜夕及晴川解凍我則散煦嫗其陽春  
豈直落餘花於黃菊翻碎浪於青蘋已哉凝韻松桂傳  
香蘭萋不行而疾合帝德之無方不厲而威若神功之  
有宰茲君令所以為此聖人於焉嘉乃觀其匪疾匪徐  
或吹或噓俾夫曲者必直勾者必舒庭葉晚飛墜井梧  
於颯雨池荷夜轉瀉珠露以連如是則草非風不靡人

非化不被故取鑒者用於斯觀政者必於是況王者致  
理與物化遷敬授人時乃何風不順式孚惠澤則何草  
不玄既殊拔木之日斯鄙偃禾之年賦風行之義可以  
知其教焉

歲寒知松柏後彫賦

以貞心勁節翠貫四時為韻

裴度

窮陰忽至品物盡瘁惟良木之堅貞映衰林而蔥翠桃  
蹊李徑聞別葉之互飛松礪柏陵見脩條之自異諒本  
性以無易託斯時而不類雖殺菽之霜再三斷蓬之風



數四徒凜凜以終日竟青青而在地懿夫春夏榮滋我不競於芳時秋冬淒冽我不改其素節遙分郁郁之煙  
遠映霏霏之雪故其桑榆種其前後杞梓植其行列或  
蕭瑟以柯空或離披而條折何在昔而相混果迄今而  
旌別觀夫陽曜以芳菲為事陰凝而肅殺為名徒運彼  
以寒暑豈齊我於枯榮斯乃時累不能累其質天損不  
能損其貞亦被霜氣亦含風聲挺喬枝而易識在灌木  
而難并故蒼然以殊致豈蠢爾以叢生果其鬱鬱秀色

亭亭高榦產二儀之內我獨後彫處羣木之中孰云共  
貫當其黃隕方可瞻翫庭有槐兮落際山有榛兮彫陰  
見枯槁之無色識茂悅之有心受日照而逾靜嚴飈吹  
而轉勁或出衆而標竒或處幽而表正雖結根山嶺移  
植軒屏如全真而率性客有擇木務材感衰歎盛悟標  
勁無永申蚍蜉之歌愛堅貞不渝發風雨之詠松兮柏  
兮猶君子之志行

直如朱絲繩賦

以題  
為韻

唐

薄芬

物有正而可尚者其繩則直如砥之平如竿之植不舒  
卷以隨用終勁挺而立極有旨哉為天下式且取其直  
也故能為道之逆旅為義之遽廬為人之端操為政之  
權輿於以方內君子所如木從之則正君受之則聖猗  
歟猗歟原夫被物之際作巧之時運工人之手績寒女  
之絲是尋是尺經之綸之其為用也不資於善結其為  
興也蓋取於無私以之為準也則矯枉有度以之辨物  
也乃去邪勿疑大者遠者念茲在茲俾夫貪者慄慄智

者兢兢其為舉直錯枉當有事於從繩

白受采賦

以苟非忠信道  
不虛啟為韻

唐

獨孤授

白者物之正色采自人之發揮有善政之功何不合執  
必遷之性詎能非所以投質而丹青必應改作而玄黃  
莫違玉色可移酒變美人之貌素容可化塵縑遊子之  
衣始以潔白為佳無文是寶流行於一掬之綠遷移於  
五彰之好假乎異物奚謂莫知其他變而從宜匪曰不  
恒其道是知白之美者采必加諸始謂不愆其素終成

求媚之虛潔其身敢望於潤色汚為染勿訝其文如露  
變盤中之文氤氲而乍結雲改封中之色燦爛而潛舒  
然知素以為貴文而後進棄彼涅而不緇從我動而無  
競知其白不足以含章美其文必滋乎彩潤豈舊染於  
姦色因物有遷自委質以成文非我無信於是推其嗜  
好窮其妍不虛白為文藻之宗繪事為朴素之後坦然  
明白佩此以飭身婉而成章是期乎假手若以考自然  
之性明發彩之功專其容知變以為義形於色不雜而

為忠英英之雲抱日之文何染鑿鑿之石補天之力何  
工如以素質莫問奇文是啟耀之以不慙之文居之以  
勿執之體可黃可黑將興墨子之悲或素或青未易殷  
王之禮不然者何以麻衣雖白兮采服斯有如雪之潔  
兮如濡已受黔生白鵠之羽赤點青繩之首發顏色兮  
不辱其身離堅白兮莫先其守懿夫明斯理者然後知  
吾道之不苟

土積成山賦

以貴其不已成  
此崇高為韻

唐  
闕名

彼山之峻兮稟氣而成此山之峻兮積壤所營何人功  
之彙聚致丘壑之崢嶸始假一抔已見進吾於往終成  
九仞還宜景行而行當其率性作勞因高立趾將覆簣  
而可久念極天而有俟道既長而彌專力雖勤而未已  
於是資地勢建土功區區而日不暇給矻矻而樂在其  
中以不拒物為心因成高大以不讓塵為德遂至穹崇  
所謂從微而至著有感而必通致峰巒而因人立跡俾  
造化而與古爭雄故得日就月將天長地久小既資於

坎窞大豈遺於培塿匪辭形倦將欲必致於雲霄所冀  
道成亦以兼容之妍不有始有卒乃勤乃勞依依漸長  
日日增高以力為謀比大不唯於熊耳將勤喻學成功  
豈謝於牛毛是謂積小以稱奇袞多而為貴既稠疊於  
委輸亦縱橫於經緯則聚米者故不足云累臺者於斯  
殊未所以塊然凝質萃爾成姿千峰可數五色無遺以  
此驗巨靈之神誠為怪也以此想愚公之事亦可淒其  
別有十載施勞三冬率是常負荷以相勉每勤求而自



揣所冀必成無虞中毀儻若因我而出雲庶亦降神而在此

滄浪濯纓賦

以君子潔身及時為韻

唐 闕名

滄浪之水兮伊楚之濱  
汗漫蕩漾兮清泠淪淪  
控三湘之淺浪從大別而派分  
澄澹清景離披曉雲彼美人兮  
何其獨商歌以思君覩斯水之洞徹  
惡吾纓之垢氛將濯其纓亦潔其已  
逐臣逋客漁翁樵子吟刈楚以激昂  
詠伐檀而筮仕哀靈均之濯足  
笑許由之洗耳載泛載

浮曷云其已泊夫白日始晞青天收潦千尋湛而見底  
萬里淨而猶埽漾磷磷之淺沙蕩靡靡之纖草紫紆浦  
淑邈遙洲島興既遠兮情亦閒纓再濯兮身亦澡于彼  
濯矣伊水之濱于彼澡矣君子之身滌我滓穢去我埃  
塵且潔淨以精微又肆志而王神孰與夫澤畔憔悴空  
見悲於楚客心之憂矣匪興刺於詩人已焉哉士生世  
兮患於不立朝聞夕死道之所急偶滄浪之且清豈坎  
埴之能習易載出處詩稱維繫歲冉冉而不留雖追悔

而何及辭曰滄浪之水兮徵楚辭臨清漪兮應昌期濯  
吾纓兮有所思韋我生兮及明時進德修業兮已矣拔  
茅彙征兮良在茲

飲貪泉賦

以言飲此泉心  
終不易為韻

唐  
胡權

吳隱之擁節南海停驂石門遇貪泉之廣陌若旨酒於  
汙樽由是徵圖籍所載耆舊之言云注茲而難窮地  
理或飲者而能移性原公乃斯言已察其事惟審十目  
所視表執心而不回一勺之多遂舉盃而就飲重言曰

所執在我寧由此泉瀉泠泠而反同潔已持惴惴而過  
甚防川恬淡相資漸滂沱於德澤清廉是守何汨沒於  
情田將正浮俗而去彼覩濫觴而在此臨川而不覺起  
予命酌而甘從率爾盈科即挹聊抒思以盤桓健筆忽  
飛寫緣情之綺靡既而威臨俗鎮塵靜邊空闔境而皆  
知嚮化四方而靡不趣風量比滄溟能控清而引濁心  
如白水可原始而要終當其境接遐荒郡惟幽僻山川  
而多含瘴霧草木而少蒙膏澤道之云遠人不願適公

藏器以俟時方遇君之側席泉云飲而名乃益彰心秉  
直而誓當不易則知貞清特立瑕穢莫侵人飲酒而蕩  
志我飲泉而洗心胡不誇於一石而不愧於千金於以  
明好惡定能否不貪為寶而可憐不飲盜泉而非偶懿  
哉君子之鴻名竹帛永垂於不朽

水木有本源賦

唐  
高 郢

木造天水窮玄森森擢千丈之秀汪汪澄萬頃之鮮散  
而成衆木疏而為百川杞梓之材備矣江湖之量存焉

竊聞源長而下流不竭未見本盛而枝葉先顛志士託以垂陰無假惡木渴者飲而滿腹何求盜泉故樹善於人人懷則甘棠不朽汎愛於衆衆湊則德水長懸方將成不言之蹊廣利涉之路俾出幽之鳥仰喬榦而能遷未濟之人因餘波而可渡鳥豈木之所擇非擇木而不棲人奚水之足鑒亦鑒水而取喻徒聞其移橙渡北不能苞貢於王國導漾之東是以昭回於昊穹木誠戀於南枝常得地而專美水豈忘於西土乃凌雲而獨崇用

不用也非結根之有異高莫高兮將聞源而實同葛藟  
猶能庇其本江漢所以朝其宗固宜大樹蔭庥而千牛  
可蔽洪河浸潤而九里旁通寧效有喬而不可休息於  
其下至廣而不可游泳於其中者哉則有青青弱幹獨  
秀未立涓涓細流餘清可挹植翰苑以蕭散赴龍門而  
驚急企樛木之逮下望恩波之流濕

虛舟賦

以浩然任觸君  
子之心為韻

唐  
樊陽源

玄理可得真宗可尋惟虛舟之不繫同大道之無心每

悠悠而去住恒泛泛而浮沈寂慮為徒必澄淡而方息  
在物無競信風濤而莫侵體合道樞來憑積水本流謙  
以處順寧遇坎而斯止類善行之無跡似至人之虛已  
或沿或汴非假功於檝師載沈載浮亦奚勞於舟子若  
乃景絕遊氛川息波文蕩漾無阻逍遙不羣則鼓枻者  
未足與議摧撞者不得而云故曰動以貞勝而靜為躁  
君觀其浮廣川之洋洋混長瀾之浩浩不拘同放曠之  
懷無著體希夷之道殊青翰之見重等玄珠之為寶惟



斯道全誰曰不然任東西之漂蕩隨風水之推遷中含  
虛而自若外守正以無偏逢流則行靡驚竈鼯之穴安  
波自往空思李郭之仙動息靡常去留不禁以虛而受  
殊乎小器易盈可濟不通非曰不勝其任處靜安卑乘  
流任時浩然獨逝邈矣誰追想好風於曲岸避巨浪於  
中坻且沒跡於寂寥檝棹何從喧矣是無爭於觸擊紉  
纜焉得維之是則虛其舟川得以寧虛其心人寡於欲  
既與道而合契亦無情於相觸苟斯理之未忘諒無驚

於寵辱

胡越同舟賦

以所思同濟寧  
患異心為韻

唐  
袁不約

胡越異方兮言語不通邂逅相遇兮扁舟之中訝形殊  
而類別偶汴浪而乘風邈矣兩鄉懷土之情則異飄然  
一葉濟川之計斯同始也各自天涯俱來波際指遙程  
於空闊紛遠思而容裔南冠朔服俄泛泛以相親孤棹  
片帆杳悠悠而未濟安危目擊休戚心期當波瀾之起  
處是肝膽之呈時水害若防不獨文身之俗風高儻便

豈惟嘶馬之思去乃夷猶來何處所不遠南北宛為儔  
侶投足而作鄰遙集共軫風濤思鄉而何暇哀吟且虞  
悠阻迹也既狎心馬匪寧搖煙蕩水泛梗飄萍在浩渺  
之難測況沿洄之不停容與安流每欣欣而會意縱橫  
駭浪咸惴惴以忘形蓋以風水多虞因依不間來非類  
聚雖慙泛洛之仙情匪貌親誠無敵國之患殊方何遠  
合志何深因託質於剡木遂忘言於斷金向若不同其  
利無得而尋長嗟繇邈莫嗣徽音則朔野慕射雕之悍

炎洲樂拾翠之心復安得同其憂患而計其浮沈哉於是察其事嘉其意諒極睽而乃合非棄同而即異永懷共濟之誠信無往而不利

飲馬投錢賦

以好善馳名叶  
乎前志為韻

唐

王損之

昔人有暗室無欺行行路岐涉清流之蕩漾指白水以驅馳乘匹馬而來念茲枯渴傾一囊以用投彼漣漪且水本無情人能誓志俯濯纓之上善控奔蹄之小駟庶隅是切斗升之水無多重價將酬子母之錢盡棄湯湯

淺瀨歷歷五銖飲之而忘其量也投之而無乃甚乎同  
濟河而沈璧異濁水以求珠隱金沙之中迷於赤仄落  
蘋繁之上混彼青蚨嗟乎利已則多潔身誠鮮在一飲  
而何損投半兩而稱善鳬鷺下處對鷺眼而難分鱸鮓  
游時雜鯨文而不辨駸駸練影滴滴波聲滿腹而自資  
行道墜泉而就謂沽名郭況之家人倘來訝移金穴漢代之  
賢郎或見猶認水衡浦淑縈盈汀洲重疊吳酌貪而難並王  
不言而雅叶致香醪而一醉且乏杖頭入春溜以俱沈不漂

榆筴澄明水底散亂馬前乍似揀金之磧何殊種玉之田逐  
好利之徒無辭俯拾同貫珠之子幾誤旁穿是知雅志無儔  
常情不到將均勻水之直自勝飲冰之操則墜銀瓶於井底  
思婦徒傷投竹杖於陂中仙翁可報賢哉項氏之心從吾所好

驥伏鹽車賦

唐  
闕名

有驥子兮維之朽索服鹽車兮困於絕漠將發憤於一  
哀遂求知於伯樂由是騰健步奮奇毛連嘶自若驤首  
彌高負調鼎之資空慙引重持向人之意終願代勞當

其迢遞燕郊蒼茫吳坂悲東道之莫及念北風之將晚  
既同跼蹐載馳之用靡分倘遇知音千里之期何遠寧  
曳輪之是辱恐負軓之非名飲翫雖憐其垂耳鞭驅奚  
敢以抗衡是知玄黃莫遇款段無營汗血匪難一日有  
祈於用力求人未易三年何恨於不鳴今也勞役薦臻  
高名斯矚將激昂以待顧願奔馳而徇欲重伸羸氣自  
殊要駕之難載發哀聲幸比擊轅之曲或有賤同牛皂  
用匪龍媒亦在異於翦拂辨以駕駘夫如是則當於輓

軌之下自然不媿於羣材

管窺豹賦

以管中窺豹時  
見一斑為韻

唐  
闕名

管實圓通豹稱奇質將竊窺以無視果遇文而得一言  
如立信初云必有可觀美在其中終荷守而勿失奚執  
虛而莫見諒衡空而有窺注目每思夫破竹專心常切  
於主皮故得精神靡怠盼睐無虧辨或未分豈敢因小  
人所視言如有準安得謂童子何知事不可輕智難相  
短瞻夫隱霧之獸乃用窺天之管豈文質之不伸獨孤



明之所滿分形既內識規規視遠惟中央坦坦然後知  
虛心可達小智攸同毫釐必遠長短皆通投迹倘遇於  
東周孰辨犬羊之稊有文而比夫西伯豈殊縲紲之中  
是謂祈進奚為求知不倦將希國士之察用當君子之  
變羅因一日期所視之無偏利絕一源專向明之獨見  
乃知蔚文者道不足攀俯視者智或防閑何微明之有  
辨果偶中之無難謂容止可觀且殊室隙同邂逅相遇  
更善通班信專美之獨嘉諒生知而何教流涕已假夫

觀止審像乃知其是效十年之學自分西晉之賢一管之明更識南山之豹夫如是則履中不昧應手無疑冀覲覲之有以得專精而所之亦何必誇久視騁一時然後知求仁之可驗唯智者之念茲

教孫升木賦

以仁義在躬教之則進為韻

唐

賈餗

孫之為物兮敏捷無倫人之設教兮質性是因顧升木之容易豈從師之苦辛於是授以程度使之緣循步步彌高同下學而上達孜孜不倦若遊藝而依仁原夫引

進他材發揮以知不言而化若喻於義指蹤在手所謂  
導而不牽嗜學因心誠宜誘之孔易俾夫趨容所騁迅  
足無累笑碩鼠之五能掩都盧之百戲初疑鴻漸訝走  
險之翩翩卒若熊經忘陷危之惴惴則知夫性自天而  
莫改教率性而斯在失之者進寸而退尺得之者師逸  
而功倍從輪奐之異規隨曲直於真宰故君子將遷於  
物必省厥躬彼可適道吾方擊蒙野性既馴自殊於狼  
子怒心不發何愧於狙公牧羊以不鞭為機養雞以似

木為傲一則行之而未遠一則久之而成教孰與簡易  
為師攀援是資既得心乎愛矣方將教以化之負凌雲  
之材庶幾仰止守墜地之道難可求思至矣哉發彼驍  
騰賴茲引力足循循而風舉木杳杳而繩直千尋雖險  
亦可超而宛升一跌無虞那肯勃如戰色豈翫物以為  
用將育材而取則所以木不告勞猱惟效順學無間於  
時習功自得於日進彼以求易於難致遠由近可因茲  
而立信

遊刀賦

以目無金牛必  
有餘地為韻

唐  
張楚

善乎庖丁之養刀也鋒不鈍銳不衄橫爽氣以凜凜頓  
霜威之肅肅內則道協於心外則手應於目三年之後  
不見全牛於是手以之發刀以之投其虛其徐刀以脔  
合所倚所觸血自潛流牛之間兮稱有刀之厚兮云無  
以無厚之刀入有間之軀與切泥而不別將委土而何  
殊忘其骨節之難易未嘗肯綮其斯須以天合天驕然  
響然目不視矣手有存焉竅之導兮自大郤之批兮自

穿始以一剖終以萬全匠石代之以運斤未可爭長孔

原本闕一字

殺之而用劍難乎同年則說屠羊以淺術望鼓

力以戰慄期百發而百中笑無固而無必乃知丁之道  
也可久丁之伎也難有利推百鍊不愧於太阿聲中八  
音自合於經首日居月諸勇其賈餘君欲口傳等文惠  
之相好我方神遇覺良庖之不如若然者遊合逍遙之  
事刃合虛白之意倘遊必有方刃何不利冉冉兮雖不  
可知恢恢兮常有餘地方將解千牛然後躊躇以滿志

目無金牛賦

以虛心通明暗  
與理會為韻

唐  
王履真

著絕藝者積功而成窮物理者因心而明觀彼庖丁之  
游刃合夫天道之至情運心術於妙用得玄技於惟精  
相彼牛兮雖完體斯在於我目也而折俎已呈豈不以  
因功之深為志所使揮無厚以合度投有間之中軌積  
就之妙既由乎月將操割之微亦依乎天理若動不導  
竅任非由已則必受夫力勛孰能免夫目視始吾於牛  
也膚革未充筋骨靡窮心無所措其利手無所施其功

惑臂臑之原本迷脈腠之要終動既多悔勤而未通逮  
三載以積用乃一朝而發蒙今吾於牛也察其博碩考  
其小大不俟刃解自將神會定貴賤之骨若委地而在  
前視血管之膏雖表革而無外信功著而理貫乃道成  
而情泰遂得不遵蓮鍰不合桑林駢駢之軀折如應手  
觶觶之角割若愜心此乃變化斯探視聽靡濫美侯明  
而咸見雖處幽而無暗夫人之脩業頗亦象諸能玄通  
而理達則疑釋而誤虛別有技業目牛得同碩鼠取勢



行止喻依庠序竊學見賢思齊敢望惟仁是與倘王庖  
之可待願發硎而延竚

破的賦

有序

唐喬潭

君子脩辭以干祿祿或不至居常以俟命感而遂通抑  
亦莊生不射故為破的賦以喻其辭曰

飛衛學射於逢蒙希其術窮搜董浦白羽之箭獲燕角  
綵沈之弓悵望隴雲徘徊朔風以為隼必獲於墉上雀  
無全於殼中或曰人將觀德子盍呈功乃見於諸侯聞

之州序獻於天子臨乎澤宮自上而下陳其比偶歌騶  
虞奏狸首其或少算從而進酒於是乎擇素士張畫侯  
韜朱膊捍韋韞既垂橐以弦弧亦啟箴而抽鏃內審其  
志外專其目釋思其平去務其速落殘月於象弭飛明  
星於金鉞宜易易而獲禽翻兢兢而失鵠師哂之曰殆  
矣王庭之賓胡為先利其器而不反求其身乃杜門三  
年猶乎家人聽之以氣視之以神秋毫如山螭心如輪  
高其小物申以歲貢從容君所無復命中不知矢之所

加弦之所控不知引之而滿縱之而送以無心為心若  
夢不夢斯焉而遽發騖然而通洞洞之者是為中的中  
之者細若毫芒乃能匪左匪右不留不揚絕心乎後牢  
落判散亦何有四方是時也君子觀之貴其得一小人  
視之多其中質九賓之衆毛豎骨驚陰幽鬼神股戰顙  
慄固可使朝肅慎面先零變幽都柔南溟至遠無外罔  
不來庭夫以有形之器猶能破的況天機為弧大直為  
矢而不能破其夷狄故事無矜功理在冥跡不射乃師

之益吾將為益

射隼高墉賦

以君子藏器待時為韻

唐敬騫

養形玄豹兮以隱霧而成文振羽飛蛾兮因附火而自焚彼紛然之落隼識昧此而喪羣誠不知高非小者所處靜為躁者之君苟失度而棲適將受斃而何云且夫長墉崇崇矗若雲峙飛隼毚毚倏倏隨風止曾不料其微陋焉更知其休否故疾惡之夫善射之子操騂角之弓調白羽之矢縱穿揚之妙呈落鴈之美量遠近於目端

審高下於規裏紛洞曾而達腋果裂素而破嘴原夫剛  
鏃初架動弦正張引彎彎之月影迸的的之星光鏟毛  
羽之振迅挫容貌之昂藏審必中而復發固焉用而不  
臧若乃處身順理投跡如常時決起而無滯或怒飛而  
有方煙雲足以遐賞翳薈足以來翔必絕捐軀之患豈  
貽在彀之殃是則素有雋志往無不利藏器者人獲隼  
者器矢應弦而上激禽應矢而橫墜微隼諒比於小人  
高墉亦方於重位苟不戒於遊處曾何免於顛躓士有

五善斯在載橐有待麗龜之知未忘貫隼之誠勿改章  
文武之不墜希葑菲之必采則知發矢有期獲禽俟時  
想大易之靈文微言可賸稽高墉之玄象壯立空持既  
是則而是倣永念茲而在茲

射隼高墉賦

以君子藏器  
待時為韻

唐

武少儀

羽族紛紛彼飛隼兮獨勁節而莫羣心耿介以騰踴  
毳班斕而被文擊每依於素節翔亦致於青雲匪全身以  
自愛寧有齒而見焚貫矣落庭既垂名於孔宣父搏鳩

陷網又伏罪於信陵君今也何時輕乎所履伊廣甸不  
遊乃高墉爰止信非位乎是蹈宜賈害而鬻死吾嘗問  
術於列禦寇學藝於熊渠子爾或舍諸吾斯過矣我矢  
惟良我弓未藏度中而發於何不臧矧專精而致用奚  
得失之難量哉於是正色斂容凝心定志睨手引滿注  
目神萃驚眩駭括將辟易以翻飛裂臆洞胸已拔離而  
迸墜觀彼隼之貽戚諒吾人之會意故君子周而不比  
用則擇地無苟進以躡高位無躁求以享厚利智昧於

是安往而免夫顛躓然則懷貪怙力者怨所聚材小任  
崇者覆可待故聖人明象象以立言懸日月而不改或  
有人兮修其詞遇其時三復射隼之兆載質射隼之期  
韋寸長而罔貴冀一聞而在斯

鳥擇木賦

以君子之德翔  
而後集為韻

唐  
闕名

鳥之擇木者不在乎得高枝在乎得所履或凌雲之榦  
而不可集或在庭之柯而必可止依惟賢之主人遠挾  
彈之公子若夫鳴而後集翔必有疑如智者之千慮叶



君子之三思山有不材豈謂心乎愛矣林多獨秀寧同  
主則擇之孰謂無心依於有德豈惟葉之萃榦之直必  
在無驚弦之憂傾巢之逼惟喬之下想遊女之求思避  
惡之陰同志士之不息若乃翼隨雲展身以風翔觀平  
林之漠漠見絕嶺之蒼蒼豈爰止兮失正誠所集兮向  
方容足之柯乃處隱身之葉是藏故有繞樹之烏鵲棲  
桐之鳳凰是知擇善而從何常之有既無巢幕之誚詎  
貽高墉之咎道惟空際諒有開而必先棲或林端乃觀

影而從後未安其所豈樂其羣傍青冥而頡頏白日出  
幽谷而翱翔碧雲水隔山而猶遠煙拂樹而漸分將欲  
巢林杪渡江濱如蕭何之擇漢主虞卿之謁趙君原其  
羽族所棲惟巢是葺雖衆樹之相蔽惟一枝而可給處  
必擇地食無不粒飛乃從宜固難妄集若然則禽之有  
靈也不可以愚智相欺不可以飛走見遺集灌既知有  
以始巢當復何時是以良木可期倘主人之見納俟我  
於庭乎而

筌蹄賦

唐邵說

至道玄默真宗朴素莫究其源孰知其故將假物以明  
象乃忘言而立喻若筌在魚若蹄在兔苟或藪澤之內  
以時而肅設溪澗之間應節而周布乃凌岑壑忘蹄與  
筌興言薄狩命駕忘旋魚發發以隨波樂只兔爰爰而  
得性怡然好之者徒發歎於終日觀之者空起羨於臨  
川斯無虞於即鹿寧有望於烹鮮於戲道有興廢時有  
通塞羨魚如之何匪筌不得逐兔如之何匪蹄不克猶

蹄在兔兔既獲而蹄可以忘猶筌在魚魚既烹而筌可  
以息亦何異遊道藩者揮郢匠之斤御道樞者削公輸  
之墨彼損之而又損故不得而有得是以聖人立教所  
寶惟真勤求若喪之旨遠索忘言之津還淳返朴求於  
道要絕聖棄智無為實賓故卓立政始輝光日新夫子  
將欲論筌蹄於宜觀盍若考前途而後導

得魚忘筌賦

以適道知歸言  
象皆遺為韻

唐

陳仲節

魚也者重泉之微因筌而索與玄珠而同歸筌也者虛

舟是依因魚而棄將緣木而有違始鈎深以假器於是終釋手而喻指之非詎比弓藏方隨矯木靡因火化奚貴焚機所以乍觀象於十日終遺形於九圍其得也且非貪餌誰曰在藻既涉無而恬鱗斯獲將遺有而虛室是寶其忘也寧捨不材匪投有昊陶唐絕巧棄智故能雖愛必捐若遁圓離方孰謂不由其道故無用者木上之冒則虧有情者在梁之翼何為彼用拙徒觀於進退此情留寧識於推移故曰因動而忘筌為後覺投虛自

得魚非前知豈殊舟既焚而空濶先濟屣將脫而止足  
由斯於以探幽落焉藏往方之俯拾故何啻於盈筐爰  
取坐遷義非同於解網必也窺清泚憑浩蕩是務得一  
不矜牽兩黃緣而來為得魚之象必也祛其意窒其源  
舟無五覆道遣三幡展轉而棄為忘筌之言使彈鋏嘉  
賓不樂烹鮮之味投竿公子何勞餌膳之煩若然投者  
諒非赴澤在虛心而自適諒非卷懷將適道以孔皆然  
後蟬蛻萬象鴻毛百骸有漁人聞而辨之曰是言也始

以神遇將終理遣謂鱗介非掩豆之實以巨浸為覆盆之淺然乎哉吾何必鳴榔而遊行

夢為魚賦

以故知人生不似魚樂為韻

唐

王 棨

梁世子以體道安居逍遙有餘宴息而魂交成夢分明而身化為魚恍若有忘顧物我以何異悠然而逝失形骸之所如其初也漏滴寒城月籠涼牖悄爾人靜溘焉夜久於銀屏既設之所是角枕已敝之後遽因神遇能游之質斯成漸覺形遷相望之心曷不是則髣髴川闊

依稀浪輕始訝沈浮而在此俄驚鬢鬣以俱生恍兮惚  
兮豈悟益刀之兆今夕何夕空懷畏網之情由是涵泳  
無疑噉喙未已值良夜之寂寂汴清波之唯唯腹上之  
松俯映在藻雖殊懷中之日旁明銜珠稍似既掉蘋尾  
還張紫鱗維熊維羆而自遠有鱸有鮓以相親沙際禽  
去汀旁草春遇周公而疑為釣叟逢傳說而謂是漁人  
于時砌竹無風庭梧有露既異為雲之事空驚微雨之  
故翻成浪迹全忘枕上之身却憶浮生寧異遼東之趣



其夢也何樂如之其覺也何愁若斯復是魚由我變抑  
當我本魚為莊生化蝶之言昔時未信公子為烏之驗  
今日方知悲夫何事遽然欲思咸若良由塵世之多故  
難及深淵之或躍人兮不因一夢之中豈信濠梁之樂  
任公子釣魚賦 有序  
唐 闕 名  
昔任公子釣魚經年不獲及其獲也衆人饜之公孫弘  
十上不遇及其遇也帝王任之固知餌大則魚大功高  
則祿厚魚也人也何酷似乎感其義以作賦曰

千載崇崇我聞任公獨坐會稽之上垂釣東海之中海  
之廣兮混然飛流魚之大兮邈矣難儔所謂之魚三千  
餘里何以為餌五十其牛其釣兮星霜已周日居月諸  
兮吞此大鈎吞鈎之時其勢迴互覺巨絙之緊急驚白  
波以鼓怒攪大海簸高濤業三山憚羣鼇及夫道盡途  
殫繩窮勢蹙突兀出水蹉跎望陸一岸山橫半天雲矗  
巨鱗既已傾海水亦以清吞舟之害平若乃飛鑿刀以  
撞突泉為膏兮岳為骨剝鱗上之重錦抉眼中之明月

由河之北達於東溟萬民饜飫三年羶腥向時今刻意  
臨川勞神有年舟人不顧漁子悠然坐石滑兮積苔蘚  
蒼葭變兮老雲烟今日兮投竿瞬息以肉為食豫且氣  
懾詹何失色契我心者臧丈人適我願者龍伯國釣道  
既爾人亦如此孫弘未遇買臣家貧海上牧豕江邊負  
薪常以雲霄自致燕雀時人受侮不少守志彌真終逢  
挺拔俱為漢臣典郡則還鄉衣錦作相而開閣迎賓則  
知餌大者魚大道肥者祿肥獲大則喜雖晚何悲魚之

與人殊途而同歸

結網求魚賦

以臨川羨魚未  
若結網為韻

唐王起

網則結緒魚方躍泉其結也疎而不失其躍也瞻之在前一縱一橫既克張於萬目無小無大亦何逃於百川是以揚鬚振鬣噴沫飛涎初求同於發筍終取義於忘筌於是當巧孜孜抗精屑屑細緝絲枲解紛結絕想江湖之相忘遂網維之備設搖賴尾以游泳爾不厭深運素手以繽紛我思善結俾晝作夜日居月諸成茲密網

念茲嘉魚庖犧之舊制無改良罟之新規有餘獻鮮藁  
之時茲為謀始烹釜鬻之日此乃厥初且夫注目劬勞  
甘心健羨於結網今何有徒噉喁而可見金盤既設無  
霍霍以霏霏錦質乍窺徒赫赫而戰戰孰若氣奮九戩  
網珠一面始結繩而爰設終在藻而咸薦疎密由已卷  
舒從心此紛紛而不紊彼潑潑而方禽亦何必不綱而  
為子釣斷罟而諫君臨其動則紛其力不費事有類於  
組織志未殊於經緯薦尾安在提綱尚未想飛鴻而則

離曷遊魚兮不畏向若臨河廣恣心賞隨揭屬之淺深  
當鱗甲之來往出彼赫鰓亦同反掌營鱸鮓方同濺滅  
之施眾禁鯢鮪豈比恢恢之漏網則知無其備者其功  
畧有其具者其利博此不憊其經營彼無逃於潛躍夫  
然觸類斯長緣情可託結詩書而為網網則有條驅爵  
祿而為魚魚兮咸若吾所以考先賢之微言悟臨川之  
妄作

烹小鮮賦

以理大國如  
烹小鮮為韻

唐

王起

有冽者泉生乎小鮮將成登俎之美必求饌鼎之妍惟  
烹也在於不撓惟魚也貴於克全苟司味之有術諒為  
政而則然若乃海曲蘆人江潭舟子厭頒首於蒲藻得  
纖鱗於沼沚常窺澈澈漏於密網之中今則炎炎烹於  
沸鼎之裏是以激之有度爛而足恥先明水火之濟用  
契鹽梅之理然後合皆有聲沸騰以烹碎文弱質萬品  
千名以脞脆之易壞當洶湧之方驚觸之則土崩可喻  
安之則錦質皆成蓋以小為貴在終和且平乃加以薑

桂雜以薪燎同露鑊之白遊東前箸而不擾雖湯騰其  
內火烈其表惟自然於衆味終不亂於羣小既薦尾而  
獲珍皆駢首而可曉向若爛之不恤撓之是刺急舒無  
節乎中躁靜不放乎外自然成魚餒而不食比水煩而  
不大空摧鱗而莫分寧去乙而知害則知國喻乎鼎人  
喻乎魚魚之亂則烹以靜人之繁則制以徐鼎中之咸  
若天下之安如鮮之烹也不撓人之理分作則將申老  
氏之戒用假庖人之職既不爽於和羹幸有光於為國



烹小鮮賦

以理國之道  
如烹鮮為韻

唐

李蟾

力刀之任庖人是司將修火以烹矣取小鮮而將之洵  
洵之中似有躍泉之勢炎炎之上猶憐漏網之姿則無  
復游小汊奮纖髻既逢鼎鑊之患永絕江湖之思其始  
也出彼清瀾委茲敞筍落細鱗於方寸之質煦微沫於  
噉喁之口齊一指而未并事寸刀而纔受驗星星之若  
無升鼎俎而何有瞻其沈浮若水洵湧如驚不有大觚  
奚假良庖之妙無容尺素何必呼兒以烹是知將善其

事亦叶於道若運動之不息則完全而莫保如或罷其  
紛紜任其顛倒則偶鹽梅之側宛若銜珠映莫蕭之中  
猶如在藻是知至人以魚小者國可喻焉其化而敦夫  
德善其烹而委之火傳則味不慝道乃全將成其心齊  
之化無貴乎獺祭之鮮且夫烹之煩而魚必毀政之撓  
而人不理魚不以煩為貴人不以撓為美反覆無極必  
為靡潰之道簡易不脩自作茲彰之始是知求全者動  
不如靜務理者語不如默動之則一鼎渾渾語之則萬

人惑惑想澈澈之微質不可而求俾浩浩之撓風無由  
自息今聖人任一意朝萬國蓋以體玄元而得諸靜寰  
海而晏如豈徒以窮高極厚之內喻之於一魚者哉

病僂丈人承蜩賦

唐高郢

巧乎道者承蜩之叟蜩擇木兮有翼叟持竿兮在手物  
我相絕嗜欲靡同彼不飛兮焉待此將擬兮何工丈人  
曰我有道也初五六日累丸為術槁木其臂朽株其質  
不墜者二則失之錙銖不墜者三則失之十一既累五

而咸若寧絕四而無必由是步平地之上入深林之下  
耳目俱營心手相假葉空密而皆見枝雖繁而不捨豈  
伊拾芥將同注瓦或挾三而兼兩或指多而就寡期於  
百中則啼猿之射乎曾不子遺珠慕鴻之弋者彼飲露  
為事蛻殼有期顧非鼎俎之實尚何彈射之疑庸詎知  
絕俗猶累凌虛亦危以無用之質遇有求之時始則長  
鳴聲嘒疾而中絕方將一舉翅蕭條而半垂豈獲戾於  
不食而構患於有綏且觴深操舟大馬捶鉤三十仞磨

崖不溺十九年肯綮皆游徒聞其事未見其憂豈知天  
覆地載四荒八極不以萬物易蜩之智不以萬物易蜩  
之翼惟精惟一無反無側用志凝神何求而不得若以  
叟為臣以蜩為賊亂繩斯理背陣斯克一言以蔽可詳  
周公之風一矢可加何遠蠻夷之域螳螂之捕兮信劣  
黃雀在後兮安得至哉丈人功並孫息

蚌鷸相持賦

以洛城風  
日為韻

唐  
郝昂

水濱父老以漁弋為事常持釣緝荷增繳且浮瀍澗晚

汴伊洛亂平激之磷磷步清流之鑿鑿匪畋魚以為務  
將釣國而為託異戕忽而害生時自斃而方搏亦猶守  
兔者目注於盧犬挾彈者志在於黃雀斬長鯨而四海  
宴如得巨魚而千里饜若夫一舉而擒兩固功全而利  
博是翔禽翼迅體輕或依岸而開合或遵渚以飛鳴既  
相遇於茲地亦相殘於此生鷗以利嘴為銛鍰蚌以外  
骨為堅城鷗以蚌為腐肉可取蚌以鷗為微禽可營鷗  
曰今日不雨必剝蚌之腹蚌曰明日不出必喪鷗之精

並相持而坎難俱莫知其困并彼漁父聞而造曰危哉  
二蟲吾見爾命之將絕吾知爾力之已窮胡不潛泳於  
深水胡不乘高於大風何故枯骸於波際何故落翮於  
沙中乃攜以俱歸釋此雙疾利其美用取其形質鵠有  
羽兮彩映華冠蚌有珠兮光照巨室雖假物類以為用  
誠亦辨說之良術莊生寓語於前古是用廣之於今日

螳螂拒轍賦

以怒臂當車生  
不知量為韻

唐陳  
 研

蠢彼微蟲勇而不懼當往來之轍跡阻東西之馳騫聞

轡轡而虎蹲佇轉轉而狼顧見危致命方確爾而靡遷  
唯敵是求乃毅然而增怒且肖形卓犖植性强梁豈奔  
衝之足畏非會遠而不當逸性喬桀雄姿激昂拖輕軀  
致命死地壯前趾若有巨防觀臥轍之時似當黃霸想  
埋輪之處何憚張綱其或輸穀千箱御姬百兩方擊轂  
之自遠已張拳而相向死且如歸路何能讓苟不折節  
於焉用壯睥其目曾不見機揮以肱豈為知量其理何  
如其生忽諸禍甚觸株之免危同戲鼎之魚行無逗撓



立必遽篠在聖人之經誠宜避地非長者之轍詎肯迴  
車且麟傷豈仁龍醢非智思控搏而莫及喻壓溺而何  
啻不若履薄兢兢臨深惴惴任肖翹之可適曷強禦之  
不避微茫膚血豈足殷其左輪展轉路塵寧止斷其右  
臂居當假息動必阽危捨鳴蟬而莫捕茂黃雀而不知  
倘所據非據亦何斯違斯謂豹狼之不若念虺蜴而何  
為且含氣之類求生之厚豈必賢哉曷云能不獨不降  
志自貽伊咎誠輜轢之所加諒齏粉而何有奚必矜夫

趯趯冒彼彭彭願陳力之方盛意當途之足驚曲循天  
理深居物情徒糾紛而莫紀因密勿而難明倘不載馳  
載驅廣人之用當念無輓無軌遂爾之生

螭螟巢螽睫賦

以天壤之間大  
小殊稟為韻

唐

王 榮

萬物生焉巨細相懸螽之睫兮螭螟在焉雖受氣以具  
體亦成形而自天取以比方事著茂先之賦齊其大小  
理符禦寇之篇眇矣麼蟲生乎積壤名為造化之內質  
類希夷之象離婁俯視莫得見其形容師曠俛聽曾未

聞乎聲響既而遊元氣入無間就彼蝨而棲宛止其睫  
以迴環日往月來顧我而因依自得晨趨暮見覺伊而  
瞬息長閒由是拂背謀安沿眶可賴喜榮乎嗜膚之際  
懼覆於成雷之會仰觀厥首謂如山嶽之崇旁睨其肩  
意似叢林之大逼螢火兮豈慮焚其蓬盼蠻兮何憚居  
之每保勁同於枝幹詎知細甚於毫釐未能鵲起安肯  
蟲疑常笑鷦鷯立彼葦苔之上寧同玄燕集於危幕之  
時豈比夫蠕動微生蝟飛異稟蠅附尾以非類蝨處頭

而殊品言乎蠢也則是曉而可知向彼巢焉乃斯形而  
因審想夫影與塵混身將道俱察其生而洪纖則別論  
其分而物我何殊似菌朝生不羨千春之壽如蜩秋起  
無慙六月之圖悲夫謂無至道者多信有茲蠢者少盖  
述齊物之域未遂忘形之表若能效三月以齊心必見  
斯蟲而不小

御定歷代賦彙卷一百十三

欽定四庫全書

御定歷代賦彙卷一百十四

寓言

以德為車賦

以至德之人有同車載為韻

唐 白行簡

人之蘊德兮唯車可同載諸身兮運轉無窮苟規模之不素在夷險以皆通遊必有方靡假顏生之御成之在我寧煩奚仲之功原夫雕斲何勞周旋不礙得亨衢古道以方駕將璞玉渾金而共載廓情田而作路終自東

自西調意馬以服箱任或進或退且見其制非假手用  
不由人馳懿範而深疑軋軋聽嘉聲而乍認鱗鱗如榮  
畫錦之衣便同華轂儻被懸鵠之服豈異椎輪是何輓  
軌無施脂膏莫有學海深而濡軌堪慮詞林秀而養材  
自久誨人不倦初訝其役車不休見賢思齊豈憚乎挾  
輶而走莫不乍行乍止載疾載徐究其理而大矣較其  
功而忽諸程君之夢捧陽精還同照乘黃霸之惠如時  
雨宛是隨車乃知德以飾身為規車將載物是致苟執

德之不惑故憑車而取類善行而所去無跡遵道而雖  
遠必至功能救旱喻流水以寧慚美播惟馨媲七香而  
何異大矣哉妙才難問良工在茲曝腹而那殊炙輶書  
紳而乍認執綏此車也價雖擅於五雲應難比矣數徒  
多於百兩未足方之士有軌轍無踰威儀靡忒逢時斯  
牽駕之用抱素乏丹青之飾儻題品之未遺願為車而  
比德

以德為車賦

以國家道通  
達通為韻

唐  
闕名

皇帝守位以仁為車以德將喻夫博載庶物取象夫經  
行萬國垂衣而退與人謀結旌而克陳帝力因樂推以  
發軔任不言而憑軾始效駕於情田之內不驅不馳終  
挂轡於王道之中自南自北夫改奢即儉尚質去華量  
包覆載迹達幽遐行乎道而四方是則同乎軌而六合  
為家是知乘玉輅者又何足比駕金根者失其所誇爾  
其伐輻於自然之材斲輪用無為之道鑒馭朽以作訓  
念輜毛而是保前覆後誠諒成敗之足徵殊途同歸信



始終之可考伊至化之所備如風令之偃草道德仁義  
配昭弓以致賢孝敬溫恭代輓輪而養老萬邦攸同九  
有克通樸斲在心詎比質於流水周行任道豈觀象於  
轉蓬以得賢為輪轅之助以守信為輓軌之功動天而  
善行無跡持重而利用不窮且工為車兮脆而易破德  
為車兮勞而晚成哂摧輪於太行憫困驥於吳坂域中  
咸賴功超乎大輅小戎天下皆肥力竭乎引重致遠澤  
可鑒而招損美不稱而崇侈爾則速禍以宣驕我則去

彼而取此靡自家而刑國俾視遠而若邇豈徒與奚仲造父之徒論功而效伎

炙輶賦

以才美潤身  
喻茲為韻

唐

喬琳

惟輶以積膏而潤惟人以積學而才潤則浸之所致學則脩之乃來亦猶山輝蓋玉之處石川媚乃珠之在胎則炙輶之義斯焉在哉原乎其始方我髦士言物也火及則潤滋言士也用之則邦理喻研朱則其色不奪方扣鐘而其音不已故可以與理窟而爭深配智囊而共

美炙之不竭夫豈同於瓶罄用之不窮固有殊於罍恥  
且國以賢興車以輶進車非輶而安往國非賢而莫鎮  
脂膏內實宜誠盈於撲滿滋液旁露信同功於河潤豈  
比薰以香而自燒玉遇火而不燼向非外取其物內滋  
其身則一炙可以就燥再乃於焉中貧亦何潤色無數  
輝光日新比至道動而愈出方君子磨而不磷原夫伊  
輶也照身以取路伊賢也開物而成務亦何近取諸身  
願借秦而為喻喻如何其惟良在茲希德澤而惠物在

脂膏以無私若然者豈止滯輜軒以聽察因鈞軸以為期增雨露之濡洽霑草芥而滋熙者哉

積薪賦

以後來者居上為韻

唐張敦實

積薪如之何伐自中野藏用如之何俟夫爨者當就燥而未及固不材而見舍我取彼竭在浸浸以增高顛之倒之信多多而益寡來因高岡之上徙殊曲突之下知附熱之足貪兼微光而是假原乎瞻彼林薄爰發條枚網繆既束負荷皆來始交積以發地俄重疊而如堆顧

遇何期亦有含音之器操持儻用豈無束濕之材匪伐  
柯於林下疑設燎於庭隈入用雖慙於散木待燃未怯  
於死灰幸薰灼之可近唯掄擇之所裁必能揚大君之  
光資烹飪以調味豈徒發大守之化祈澍雨以攘災觀  
其疊迹連牆攢形內向功成執熱化歸炎上催發生於  
庖人廢全模於梓匠曾不知縱橫長短之術成結構高  
卑之狀犬牙交列未失本枝之形蠅翼巧成猶蓄運斤  
之望豈徒分彊幹弱枝之義留錯節盤根之餘異掄材

而晉用似槽巢而夏居幸燭火未息與獸炭焚如無之  
實難鑽燧者於茲待乏雖欲勿用和羹者焉能捨諸古  
人徵用賢之乖喻積薪為偶奚自我而爭先反忽焉而  
在後念採掇之所在顧高下而何有儻堅貞之可求庶  
有心而不朽

積薪賦

以帝取汲  
黯為韻

唐  
闕名

僕少好讀書長而無替謝絕門客幽闔長閉志尋經史  
見汲黯積薪之言即知君臣有道之契乃廢卷憤色踈

袂臨砌豈吾道業謝於古人君德慙於往帝竟空鹽梅  
之用長虛舟楫之濟於是辭雲林裂荷薜赴以時貢擬  
先秋計何歲華之不與幾山川之迢遞積薪暗入於心  
期後來空望其他惠積薪何薪唯楚與桂其採之也翹  
車載馳畢搜其林壑其得之也良材盡取靡遺其巨細  
風塵爾勞阡陌相繼辭雲壤而百處指王城而四詣得  
大有之妙象同萃亨之深智無怠其功有司是主雖不  
近於丹陛幸得貯其華宇然蓄薪而雖多非有命而不

取每至膳夫興造金鼎初汲論食玉而來窺將然桂而  
先挹勿貴先至在其下兮必棄置於後時勿輕後來居  
其上兮必取用而先及此自然之理胡物情之可習已  
矣哉蒼苔蕪兮白露湛愁來曉夜紅顏減君若助化於  
聖明伏望留情於汲黯

積薪賦

有序

唐  
李德裕

此郡巖壑重複林麓繁盛樵採之子未嘗輟音往往汭  
流而下詣余求售余因積薪於庭竊有所歎乃為積薪



賦賦曰

邈巖居之幽遠有楚澤之放臣方絕學以自黷誠未暇  
於披榛悲顏子之飯煤感萊蕪之生塵時束蘊以請火  
訪蓬茨之善隣乃遇樵客維舟水濱余訊之曰採樵賤  
業常棲隱淪詩既嘉於刈楚傳亦歎於析薪爾豈延瀨  
之客不取金而且貧又豈叔敖之子似好廉而苦辛何  
乃負擔不已其生實勤客顧余而歎曰貴則近禍富多  
不仁寄迹於此以養吾真善大雅之知言信芻蕘之可

詢既而交加累積高下齊均矗若井幹疊似龍鱗避沈  
泉而無浸生曲突而不陳苟知防患之術終無焦爛之  
賓嗟長孺之味道常喻此而求伸雖後來之高處亦居  
上而先焚使薪為能言之物豈欲入爨而揚芬未若生  
幽崖之側紉芳桂之輪不近野田之燎免勞匠者之斤  
冒霰雪以終歲齊天年於大椿

積薪賦

宋  
田錫

翹翹錯薪委積交陳後來者漸次居上先用者逐熟相

親仰之彌高或連枝而帶葉怨不在大喻棄故而從新  
其大也降鸞輅於東封祝圓丘於南至執玉帛者萬國  
稱豆籩於羣吏禮容具舉樂章大備書稱柴望達上帝  
於外禋詩曰薪蒸本周人之貴氣虞衡往來析薪成帷  
載來北闕之下采自南山之隈輦運錯雜積疊崔嵬但  
取禋宗之用不論瑰異之材譬如為山豈勉力於勤學  
寧媚於竈不旋踵於貽災薪既不能自言人或代之析  
理繫吾儕小人與彼其之子憂負荷以弗勝為衆多之

仰止匪斧不克因伐木以致身受人之知合不才而省  
已始采采於山水之涯丁丁合風雅之詩積之累之如  
京如坻遠望比層巢之峻仰瞻倅累卵之危居中者謂  
不我遐棄在下者謂人不我知美古人善喻下僚其咨  
本入用之遲速胡舛望於高卑

大巧若拙賦

以隨物成器巧  
在乎中為韻

唐  
白居易

巧之小者有為可得而窺巧之大者無朕不可得而知  
蓋取之於冥受之以隨動而有度舉必合規故曰大巧

若拙其義在斯若乃掄材於山審器於物將務乎心匠  
之忖度不在乎手澤之翦拂故為棟者任其自天而端  
為輪者取其因地而屈其工也於物無情其正也於法  
有程既遊藝而功立亦居肆而事成大小存乎目擊材  
無所棄用舍在於指顧物莫能爭然後任道弘用隨形  
制器信無為而為因所利而利不凝滯於物必簡易於  
事豈朝疲而夕倦庶日省而月試知大巧之有成見庶  
物之無棄然則比其義取其類亦猶善為政者物得其

宜能官人者才適其位嘉其尺度有則繩墨無撓工非  
剗自得不矜之能器靡雕鏤誰識無心之巧衆謂之  
拙以其因物不改我謂之巧以其成功不宰不改故物  
全不宰故功倍遇以神也郢匠之術攸同合乎道焉老  
氏之言斯在噫舟車器異杞梓材殊罔枉杓以鑿罔破  
圓為觚必將考廣狹以分寸定利方以規模則物不能  
以長短隱材不能以曲直誣可謂藝之要道之樞是謂  
心之術也豈慮手之傷乎且夫大明若蒙大盈若冲是

以大巧棄其末功則知巧在乎不違天真非役神於木  
人之內巧在乎無枉物性非勞形於棘猴之中若然者  
豈徒與般爾之輩騁伎而校功哉

工先利器賦

以器苟未精將  
何為巧為韻

唐  
魏式

工有習藝求名志在不朽乃言曰藝未達不可求以諸  
已器未精徒勞措以其手安得輕進自貽伊醜於是磨  
礪為先動用為後誠旨趣之可尚實果決之不苟所謂  
作事謀始本立道生繩墨盡索斤斧畢呈慮妍媸之稍

違而或愆規矩審鋒鋸以求銳必取專精懃懃不怠矻矻有營欲盡心於鈹鏤用度木於林衡亦如舟楫良然後思其濟涉耒耜利始得議其耦耕於其發矨可視以精為貴不然何以能久用之不既驗樸斲之有辭懼剖剗之猶未爰究爰度無或不良揣八材之質淬百鍊之鋼然後切磨效竒成至寶之美剗剗中度用巨材之長呈機巧以盡善豈濫竽之是將且斟酌不撓矜名嘗巧雕鐫非他施功幾何既適心而便手因投刃以攢柯向



使因循為心則器必殘缺若苟且從事則人亦詆訶安  
得不分班倅之玄妙就玉石之琢磨觀夫欲展而能先  
礪其器以工立喻則人不二可為庶事之規寧比匹夫  
之志故曰用藝者儆戒不遠立身者得失由斯若幸而  
濫進則人必爾窺是以君子不容易於所為

運斤賦

以上下相應  
其志同為韻

唐  
席夔

道貴乎樸物疵於妄為謀者必定於前執技者可以事  
上繫郢人與匠石能器合而神王墜復在鼻將欲表微

揮拂以斤何其用壯既分庭以離立亦持刃而相向於  
是算錙銖慎取舍運之於手將匪疾而匪徐愜之於心  
寧我欺而爾假志而必中同引滿於彀中妙不可傳猶  
斲輪於堂下況乎器也利工也良壯前趾耀雄鋌以身  
運臂兮臂可使以彼契此兮此可忘迫其勢則成風含  
響激其石迺飛電分光欲臻夫妙在慎其相故受刃者  
不為股慄執柯者無聞手傷向使受刃者震懾執柯者  
動勦則必滅爾鼻而剝爾面豈惟破我斧而缺我斨亦

猶朋儕見知工用可稱藝成道得合調諧聲豈同夫衆  
人遇我狂夫阻之璫璫庶匠丁丁在茲得離婁督繩而  
尚失以公輸削墨而猶疑安能霜刃投虛必去乎蠅翼  
圓柯在握不失乎毫釐是吾質也實惟何其知音可托  
無乃後時客有多才博雅好奇尚異糟粕既得頗讀古  
人之書鑿枘可規願行夫子之志將求輪扁之術以廣  
運斤之事乃歌曰彼二子兮以藝相崇得一理兮其心  
則同運斤在手誠可懼堅立不動神之雄豈運斤者妙

其術堅立者知其工幸見遇於郢匠無輟響於成風

運斤賦

以上相應  
其志同為韻

唐  
獨孤授

漆園傲吏志愜神王和而不唱或崆峒之間或濠濮之  
上誠道樞之同體表人情之異狀爰感激於惠施乃興  
之於郢匠嗟乎功有善價吾道之亞既出鬼而入神亦  
千變而萬化可以迎夫遠近可以接夫上下用之朋友  
管鮑可以全交行之君臣桓文可以致霸請言其始也  
鼻之堊兮匠之良子有度兮我有長形枯木兮自若斤

成風兮允臧土微微以霞散刃熒熒以電光信之者雙  
美疑之者兩傷其為心也以濟其為妙也更相吾固知  
青萍之術兮空設公輸之巧兮徒嘗實由氣同者合聲  
同者應揮手餘地因悟解牛之能忘情銛鋒宛識狎鷗  
之興豈兩賢之相厄乃二人之俱別有不度其時不稽  
厥疑蒿目猶視蓬心自師代匠石而忍垢騁鋒刃而勿  
思永昧心得圖為面欺苟臨事以率爾成後悔而悽其  
且傷於手之是懼亦何暇乎涅而不緇曷若素緝乃事

爰定乃志料輕重審同異曾無恐泥之憂頗識斷金之  
利雕鏤合乎神理磨礱出乎人意苟自得以忘形亦可  
斷乎有鼻至於道洽情融體異心同求之不得感而遂  
通利器見投尚倉惶於麾下良工斯在乃拂拭於塗中  
君既有執柯之便豈比夫按劍之雄

攻堅木賦

以學者攻藝必  
求至精為韻

唐

李程

工之制器兮雕乎樸人之興藝兮志乎學利用者擁腫  
無前善扣者春容乃覺多聞匪闕於疑殆成器克資乎

雕斲故研精方啓於憤悱用當各施於輪栢且夫材有柔勁工有趣舍於以鑽木後其堅乎於以揮斤先其易者鈎繩定其規矩斧斤飄其上下剗剗罔輟疾徐既工鏤鱗皴於理外撫精粹於文中攢節劃以洞解奧義渙乎遂通則知藝或有孚雖至剛而斯剖學乃將習奚異端之可攻方同規於大匠期繼業於良工是以木碎其節學殫於藝殊宰我之難雕匪般倅之易制既飾以文亦麗其質講學所貴乎無方摧堅不可以無術每投虛

以措刃故功倍而身逸盡乎精微之理誰謂不然得於  
心術之間孰云無必藝通玄兮堅剛則柔學通微兮指  
歸可求俾不才而成用化扞格以優游工之成功志之  
所至信念茲而在茲因比物而醜類之木也破其輪囷  
之學也究其奧秘礱斲斯成良工有程殫材人之學好  
剗者之精終朝匪勞於矻矻空谷誰聽乎丁丁既成風  
於郢匠期大扣於希聲

執柯伐柯賦

以觀則於手人  
道寧遠為韻

唐謝觀



手運斧而方圓自縱斧有柯而規模可觀誠取則之非  
遠曷持心以常難是知選材於山操刃於手將散樸於  
大巧是侔形於妙有則可審分寸定妍不脫故而圖新  
瞻前而顧後然後擬議是啓經營靡停方坎坎以無撓  
聿丁丁而未寧觀所措而舉措因其形而制形且勿謂  
效之難尚俟乎繩墨勿謂象之遠仍憂乎差忒左手將  
舉其樸斲右手足見其成式不離指掌之傍自有短長  
之域龜鏡頗邇儀容在側見幾而作成於目擊之間殷

鑒不遠便契握中之則何必公輸是集梓匠具陳雖欲  
遠徵其類不如近取諸身於造次顛沛之時尚思行已  
在一顧一盼之所何必求人庶得揣稱攸宜諮謀可考  
冀析薪之入用知缺斨之足保終懷繼踵之誠未來從  
繩之道嗟乎柯在手兮至近不能觀者有諸道於身而  
豈遠不能行者信歟故取則於人者失聞道於人者疎  
乃可端其末慎其初反視於周旋之內收心於躁動之  
餘因而利焉是可宗也譬以身者方或同於夫如是正

其規從其本揆度而枉柄無阻睥睨而迷途自返儻忠  
恕之内存信率性之非遠

冰壺賦

以清如玉壺冰何  
慚宿昔意為韻

唐陶翰

惟冰也有堅凝之貞惟壺也有虛受之明謝周流之弱  
質託鎔鑄以成名直方任器規圓愜情對光輝而比色  
因擊扣而馳聲冰假壺以為用壺含冰而轉清及夫歡  
呈朝晏之餘瑞表經綸之初尤荀吳之失對陷王羈之  
後車既遇賞以為樂乃獲成於所如但觀夫推移在道

澄澈如玉時見瑩而則明或將摧而不曲故曰冰貴於水器尊者壺國因時而必用軍每擊而何虞若乃周將酬客魯欲藏冰揖籍父其何忌顧申豐而可憑是以用之者廣須之者多遇薛鼓而擊誦幽詩而何至於冰銷滴潤壺聲成酣乃挾纊以荷德豈知漏而興慚昔者趙衰從徑魏主其逐雖有餒而仍攜顧無虞而未宿每覽餘軌當思踐迹志未吐於平生容已衰於疇昔儻開冰之可薦庶投壺而無斃况霜空且寒晚景仍墜雖杼軸

而不輟猶髣髴而無記將投皎潔之姿願假舍容之意

冰壺賦

以清如玉壺冰何  
慙宿昔意為韻

唐  
崔損

炯乎太陽之精玉有真質冰則貞清我君子象諸溫如  
皎如正其色兮匪真不克峻其節兮匪貞不居爾其製  
盤盂訪結綠瞻白虹之氣詠生芻之束乃賦於他山攻  
此良玉剡之成器錯以成壺信以旁達忠不掩瑜以虛  
而受用當其無及乎嚴律閉陰氣升氛霧結河海凝沙  
驚鴈塞雪滿峻陵於是天景初夕玉壺始冰臨象筵而

孤映對金鏡而相澄爾其淋漓未泮溫潤而瑳纖光不  
隱毫末不過豈爾瑕之可匿玷之可磨不然珉之衆矣  
貴玉者何心之潔矣飲冰則那莊氏寓論宣父式談夜  
光奪魄明月懷慚豈比夫立槩生操激清勵貪伊至人  
之比德同貞士之司南夫以物象所鑒精明所蓄霜華  
晨清月影寒宿故覽之者魂竦憑之者慮惕迨北風之  
已壯幸西陸之未覲客有撫而歎曰猗歟猗歟吾無是  
易且漏卮無當兮歎諸古大圭不瑑兮聞諸昔曷若茲

器之可佳諒君子之弘益然後宣其烈贊其意抽毫命簡賦冰壺之盛事

玉壺冰賦

以堅白貞虛作人之則為韻

唐闕名

壺至潔玉至鮮有若君子清標儼然色澄澄而外澈質規規而內圓月出皎兮入夜而其儀難見冰以風壯處寒而其實逾堅諒負奇而可翫超衆器而為先當其韜光幽山韞耀窮石隱榛蕪而懷寶淪泥滓而藏白如虹之氣雖無謝於雲煙抵鵲之鄉常見儔於瓦礫於是卞

生見而神動匠氏聞而心惜乃奮剖刻耀精明以玉之  
美作壺之形信無瑕之可用若不琢兮何成以虛而受  
達人侔其弘量以明而鑒志士效其清貞若其稟性溫  
如作器含虛正色則惟珍是務立操則匪貞不居爾乃  
嚴氣凝玄陰作寒飈一振具物寥索川晶晶以凌湍林  
稍稍而木落日既暮兮金閨寂夜一寒兮玉壺陳素冰  
滿腹清光照人臨象筵而色媚入金鏡而影新對之者  
暢慮觀之者清神能勵貪夫何假盤盂之戒有同儒士



長為席上之珍是以隨珠奪魄趙璧慙姿瑚璉之器斯  
實為之美人曾不足方其皎潔錦衾亦安敢誇其陸離  
偉夫掩物之美比人之德素其表兮其儀不忒實其中  
兮秉心淵塞伊烈士之指南固賢人之軌則

玉壺冰賦

明  
袁宗道

歲既暮日方升姑射主人睹玉壺冰焉問於憑虛丈人  
曰斯何物歟若斯之清瑩也方今客主無所攄情子其  
抽秘思騁妍辭侔色揣稱為我賦之憑虛丈人三巡而

起揚袂而稱曰僕聞玉比德於君子冰並潔於神人山海備載夫龍首幽風發詠於凌陰璞或獻於楚山井或鑿於凌雲賜重宣室值倍連城或不礪而自朗或屢琢而稱珍玉號貞栗冰亦堅瑩離之則並美合之則雙清爾乃采玉於石剡器成壺以虛而受用當其無侔巧周瓚埒奇夏瑚於是嚴律閉陰雲升朔氣至河海凝大荒雪滿沙塞鴻驚天景初夕玉壺始冰質規規而外圓色輝輝而內瑩遠而望之若太陰團團升銀海迫而察之

若沆瀣洗朗浮金莖若夫朝開霽色旭日瞳矇光射冰  
壺如紫金之在鎔殷殷爍爍照映房櫳或望舒繼明羲  
馭已沒光凝冰壺若明鏡之出匣晶晶熒熒可鑑毛髮  
若乃置於殿廡列諸明堂彩襲龍衮色耀黼裳琬琰陳  
兮韜輝弘璧設兮掩光其或清廟肅穆圭俎靜閑用昭  
潔祓式供清燕間觥醪之璀璨添秬鬯之泔淡又若依  
玉堂近紫庭軸帙生色几席增明飄兮清翰墨之思脩  
焉遠闌闌之塵至若賓筵乍啓酬獻初行助綺筵兮靜

嘉祿錦席兮炎蒸夫何借龍皮之扇不用冷蛇之縈釋  
肺腑之塵鞅愜賓友之歡情信使夜光奪魄明月懷慚  
隨珠失照趙璧讓妍刻畫非人工可及瑰奇似神工所  
完故能令對之者慮暢觀之者神清何涼草之可擬豈  
寒孤之能勝雖形質不盈夫尺寸照燭止及夫戶庭然  
已寬然具體乎閭苑而髣髴乎蓬瀛見者似已濯魄於  
瑤瓊亦何必躡足於峻嶺也稱引既已再作而為亂曰  
玉匪冰兮空復守貞冰匪玉兮未離滓塵冰假玉以為

用兮玉含冰而轉清立方任器規圓協情緣時呈象含  
光肖形溫如皎如衆君子之清貞姑射主人欣然促膝  
相屬曰善哉子曙於冰壺之德矣乎微子鴻辭則冰自  
貞孰章厥美矣於是命觴飾腊敬薦上客庸佩玉音服  
之無斁

玉壺冰賦

明

黃汝良

乾坤融結塊垤精英太素異寓妙有各呈故粹然而溫  
潤者則連城之美玉皎然而輝映者則玄冬之層冰或

托艮而為璞或止坎而成形或毓陽精而見寶或秉陰  
德而下凝或變風威而積雪或蘊西崑與南荆斯皆稟  
清淑於自然非人力之所營然而隨象賦質不相為能  
朱若清標交暎皎潔渾成玲瓏中結純粹外承嫵媚鮮  
妍圓滿淨瑩皓皓盱盱濂濂泠泠晶晶皚皚雙美是并  
對之而神爽觀之而心靈臨華筵而色媚伴寶鑒而影  
明賽方諸之津夜月軼瑞露之溥金莖爾其縣圃之山  
平丘之澤孕奇鍾秀精彩赫奕夜光含輝截肪吐白相

以卞和之工劇以他山之石尚象準規虛中為谷婆娑  
肉好不傾不圻犧象黃彝咸遜品式懸黎結綠於是咸  
失爾乃涵以地六盛以天一灌以圓淵之潤注以靈潮  
之液置以瓊宮之署居以璇穹之室塵壒不揚氤氲寧  
謐靜蟻蠊澄蠶肸於是蓐收焱逝玄冥屆節急景馳流  
朔風蕭瑟飈獵獵而凜凜風颼颼而颼颼雪肅颯以霏  
霏木搖落而槭槭履霜移候應鍾司律一夜栗烈凍沍  
內實團團盈盈纈密以栗爾其為狀也朝澈騷駸平濊

澗漾表裏洞見纖毫莫障月輪齊潔璇蓋等樣爾其為  
氣也凜冽清警光芒直上窈窕綽約雪煜燎亮條達晃  
朗孚尹旁邕寒景透兮水晶簾流光射兮雲母帳寶砌  
霜明差足狀其髣髴瑤臺雪暎畧可窺其色相誠沆瀣  
凝精於一掬碧落斂氣於蒼漭豈俗物可喻其佳境庶  
高標能賞其神王於是則有阿閣洞房葯室蘭堂王公  
貴人薦醪舉觴重貉火浣隆冬載陽耳熱析醒愛彼寒  
光又有文人學士藻雅芬芳句落珠璣筆灑琳琅却紛



華而不事寄素業於縹緗掛條冰於冊府擬片玉於崑  
岡顧景沱寥抽絲對揚又有姑射之仙浮丘之侶鍊形  
咽氣却粒絕糧饑餐玉露之屑渴飲瓊液之漿御冷風  
而超忽襲灝氣以徜徉斯皆因人而異趨未若貞士之  
所臧皦精明而澄澈皓鮮白而含章既堅貞而不滓亦  
虛受以為量員中規而匪隨守峻嶒而無傷絕氛埃之  
點染精鑒別於微茫繫姱修與內美思勗德於勿忘辭  
曰極北冰天遠渺邈兮寒甚冰海混塤黷兮百川潢汙

豈無冰兮納穢藏疾煩鬱濁兮未若玉壺瑩且澈兮冰  
之承矣晃濯濯兮員朗璀璨匪雕琢兮吁嗟乎懿茲清  
德吾所服兮

玉壺冰賦

明  
李沂

曾城之產崑山之璞漱丹水之淵淪映瑤岑之埵瑩迺  
有良匠琢而為壺內圓而朗外潔而孤寒冰乍凝玄冬  
凜冽置之壺中虛室生白其澄泓也落九天之銀河其  
空明也迴三秋之素月韋容光之近照比芳輝於前哲

厥惟叔度恢雅量於千頃亦有伯起砥清節於四知偉  
文正絕俗之標却珠玉而不御高清晰出塵之韻以琴  
鶴而自隨希文襟抱灑然恒先憂以明志君實器宇凝  
定惟對人以不欺數公心跡煒煒熒熒如玉之貞如冰  
之明虛而能受滿而不盈掩二曜之景鑠颺千古之榮  
名吾將晞聲光於靈府曜藻采於蓬瀛豈徒續鮑昭之  
詠寫冰壺之清哉

倚天劒賦

宋  
田錫

昔齊諧有志怪之篇言古皇造物之先形之剛克者靜  
以為地氣之清明者外而為天地與衆流而右走天與  
三辰兮左旋籌二儀之睽闊諒億萬之相懸有古皇所  
佩之劒其言可驗喻其大也若雪山之皚皚壯其光也  
若秋波之湛湛倚於穹圓高巍峩焉孕長庚於太極稱  
純兌於西偏莫辨靈芒或日明而月晦詎分剛氣或噓  
雲而吸煙夜吼半空比雄風之九萬朝披迴漢陋蓮峯  
之五千北斗挂於鋒鏑而七星錯落長虹綰於轆轤而

雙帶蜿蜒論其用也制混茫以為天地觀其迹也裁融  
結以為山川噫女媧斷鼇於海隅漢皇斬蛇於澤邊庚  
輿所試者幾十闔廬所寶者三千鎔鄒之與干將魚腸  
之與龍淵皆微茫瑣碎之器用非陰陽造化之陶甄觀  
夫煌煌煒煒上莫窮其幾千萬里錯星象而倒河漢懾  
精靈而竄神鬼變良宵之景若白晝之明照幽都之涯  
若太陽之晷顧滄海以堪淬將泰山之作砥乍疑天發  
殺機鯨鯢奔而龍蛇起又觀乎黯黯森森高莫詢其幾

千萬尋鋒銑瑩而雪霜冷靈怪多而風雨陰移春景之  
和若秋郊之氛易炎天之燠若寒谷之深可以挂扶桑  
若木之杪磨蓬萊方丈之岑所謂天之利器浮雲決而  
妖星流皎兮若黃河之冰立而未泮焜兮若銀河之瀑  
凝而不散珠聯垂象飾寶匣以瑩煌璧合太陽耀連環  
之璀璨晉邦一鼓之鐵堪恥微功棠谿百鍊之金難矜  
善斷炳然若大電垂而欲飛燿然若流虹挺而增輝風  
霜肅殺助其利雷霆霹靂揚其威龍伯旁觀魂飛而駭

其獲落巨靈仰視汗下而驚其陸離截鴻雁而斷兕犀  
將安比也自豪曹而稱搗具何足多之雖天柱折我劍  
鋒不缺雖日馭沉我劍光不滅有時雪飛千里如削巨  
魚之鱗有時霞滿九霄若染長鯨之血迫而觀之猶千  
里而近則毛髮森豎嚴凝凜冽倏而觀之猶七日來復  
則神思惝恍晶熒皎潔乍憂剗大象而屠六龍天網斷  
而地維絕適足飾帝心之奮怒示天威之勇決粵有魁  
梧丈夫侔儻雄圖手操斗極肩倚天樞唯四時與六氣

為一吸而一呼因睥劍而色動欲誅姦而氣粗於是冠  
青雲之纓綏曳黃裳之襜褕謁紫微朝清都排閭闔以  
直入瞻冕旒而前趨曰臣聞立大功者雖以濟濟多士  
禦大難者必用赳赳武夫所以贊經綸之霸略成恢廓  
之皇圖願得倚天之劍將以靜四海而清八區逆天命  
者為陛下顯戮反天道者為陛下行誅俾萬靈奉職而  
不敢為淫厲使百神畏威而不敢為毒痛則下土無札  
瘥之患生民無水旱之虞冀聖人無為而靜理庶位有



截而昭蘇帝曰壯哉斯劍也始以陰陽為炭天地為鑪  
崑山之衆寶皆索厚地之精金畢輸敕風伯以司鞬詔  
雨師而合塗千英萬靈前馳後驅天老練日時之吉太  
一詳銳利之符然後鑄於道鎔於德鍛之以靜削之以  
默淬以明智磨乎睿識以天山之雪融其輝以豐嶺之  
霜耀其色其鐔所以橫於東南其鋒由是周於西北然  
後脊中夏而刃外區匣六幽而藏八極非聖人之大寶  
不足飾其容非罔象之玄珠不足償其直壘五山而溝

四海資以守邦帶河漢而礪崑崙用之宣力今予賜汝  
汝可佐皇王而衛邦國丈夫乃拜手而謝趨風抗詞曰  
臣欣遭聖時幸至天墀罄忠誠之有請遇宸衷之弗違  
持神器以寵賴敢戎行之越思嘗聞授鉞者得專征  
伐賜彤旅者用揚明威實中權之節制奉皇家之典彝  
臣有三事為陛下陳之粵有馮夷之神遐棄厥司忽朝  
宗之常道肆橫流而自私堯為之咨嗟舜為之胼胝幾  
欲萍藻我蒸民汙瀦我方祗臣嘗竊憤今得誅之其次

曰屏翳之神不貞其師遇旱則密西郊以含潤因潦則  
憑北方以流滋望舒為之韜明羲和為之藏暉幾欲蒙  
我融明之鑒全其鄙沛之非臣嘗哀怒今得刑之抑有  
吞舟之鱗谷其口陵其頤自尊乎介甲之族縱暴於朝  
夕之池帆檣為之蕩覆湍浪為之羣飛臣嘗懷恨今當  
戮之此三者皆姦雄之大也積凶德而無疑陛下謂之  
何如帝曰閫外之事將軍裁之

稷下賦

宋  
司馬光

齊王樂五帝之遐風嘉三王之茂烈致千里之奇士總  
百家之偉說於是築鉅館臨康衢盛處士之遊壯學者  
之居美矣哉高門橫閭夏屋長檐鑄壘明潔几杖清嚴  
爾乃雜佩華纓淨冠素履端居危坐規行矩止相與奮  
髯橫議投袂高談下論孔墨上述羲炎樹同拔異辨是  
分非榮譽樵株為之蓊蔚訾毀理美化為瑕疵譬若蘭  
芷蒿莎布濩於雲夢之沕鴻鵠鴝鵒鼓舞於渤澥之涯  
於是齊王沛然來遊欣然是喜謂稷下之富盡海內之

美慨乎有自得之志矣祭酒荀卿進而稱曰吾王闢仁  
義之塗殖詩書之林安人之慮廣致治之意深然而諸  
侯未服四鄰交侵士有行役之怨民有愁痛之音意者  
臣等道術之淺薄未足以稱王之用也王曰先生  
之責寡人深矣願卒聞之對曰臣聞之珉珎亂玉魚目  
間珠泥沙漲者其泉恩莠莠茂者其穀蕪網者棄網而  
失叙行者多岐而喪塗今是非一槩邪正同區異端角  
進大道羈孤何以齊蹤於夏商繼軫於唐虞誠能撥去

浮末敦明本初修先王之典禮踐大聖之規模德被品物威加海隅忠正修烈讒邪放疎行其言不必飽其腹用其道不必煖其膚使臣飯粱齧肥而餐驕君之祿不若荷鉏秉耒而為堯舜之徒惜夫美食華衣高堂閒室鳳藻鵠腸豹文麋質誦無用之言費難得之日民未治不與其憂國將危不知其失臣竊以大王為徒慕養賢之名而未覩用賢之實也已

乘桴浮於海賦

以鳳也有時乘桴浮海為韻

宋

李綱

鳳鳥不至島夷是圖顧卒老於環轍遂決意而乘桴悼  
道不行已焉哉吾往矣好勇而義從我者其由乎蓋以  
道大莫容材高難用歷聘而無所鈎說立言而徒焉折  
衷長沮問而知津接輿過而歌鳳用於鄒魯猶舟車易  
地而行窮於商周踐芻狗已陳之夢曷若脫此世網適  
乎海涯進退去就之在我損益盈虛之有時凌重溟之  
浩蕩閱萬象之瓌奇擴爾無垠乍心凝而形釋泛然不  
繫乃神動而天隨挹不可窮遊無何有晝所適兮憑萬

里之長風夜何方兮瞻七星之維斗井蛙聞風而跼坎  
所以震驚河伯順流而望洋宜其知醜豈不以雖險利  
涉惟虛可乘樂天命而無適非土仗忠信而其安如陵  
六合軒呈知乾坤之高厚八紘開露觀日月之沉升實  
由渟蓄無私含容善下渺無涯涘雖七旱而何傷來有  
淵源沛百川而皆瀉夫子遊焉吾道窮也蓋抱德以行  
藏豈留情於用舍去聖既遠餘風未休魯連感時而高  
蹈管寧避世而長浮風浪喧飀未若讒波之險魚龍出



沒尚寬寇盜之憂爰有羈臣遠投瘴海短髮白而早衰  
寸心丹而不改荷三朝之眷知雖萬死而何悔仰聖哲  
之風流庶茲誠之有在

交難賦

宋

楊萬里

客有問於楊子曰蒙學於羿羿為盡技技在羿則羿安  
技在蒙則羿危孟子不罪蒙而罪羿子無疑歟楊子曰  
子虛之子不可以問太系言有托也周子之兄不可以  
談夢寐言罔覺也子以為孟子之言無為而作也邪客

曰擇而後友其友端矣友而後擇其盟寒矣且蒙之為人也薄乎人爾羿何與之盡驩射之傳與否不足道也羿獨不與交而難之乎楊子曰客知其一未知其二也昔者孔壬詐堯晝寢誑孔象以愛兄之道來雖舜亦為之動蓋天之生物有萬其品彼淑慝之不齊造物不能為之禁閔臬心於鸞喙予施旨甘而報予以鳩雖聖哲兮奈何羿何為兮已甚其或免而或遭惟繫幸與不幸且夫孟子之於樂克誅其舍館之未定今使臬陶而為

理與蘇公而同聽一則訴投師之寃一則責見師之敬  
羌皋蘇兮於斯將二罪兮孰訂嗟兮人之生世孰無朋  
儔言合則金春而玉應意適則雲凝而風休蓋亦天與  
之樂道與之謀也若夫器之與居馭之與徒思一射之  
愈已則側目而相圖如羿者政可哀耳莊周曰求其至  
此而不一得者命也夫其羿之謂乎客笑曰子言則美  
矣吾則異於子矣雖自今息交以絕遊雞肋不足以煩  
一矢公等皆去吾亦從此逝矣

苦櫻賦

有序

宋何耕

余承乏成都郡丞官居舫齋之東有櫻樹焉本大實小其熟猥多鮮紅可愛而苦不可食雖烏雀亦棄之感而賦之

始余至於官居盼茲樹之特奇榦擁腫以上達條扶疎而下披蔭露井其有餘知封植之幾時或告予以含桃出饒涎而流頤意薦廟之珍果必甘滋之若飴幸一熟之得嘗指麥秋以為期忽春事之已晚訝子結之獨遲

初瑣碎以破蕾漸毓稠而著枝聊攀摘以適口乃苦澁  
而顰眉類置膽於越國異如薺於周詩謝芳液之津津  
空殷紅之纍纍誤來集之衆鳥詎無知之羣兒感人事  
之大謬為累欹而齎咨或名美而實乖或表盛而裏虧  
或色厲而內荏或迹公而情私鷺翰假於鳳鳴羊質混  
於虎皮佞似聖以疇測姦託儒而莫窺莽恭儉以竊國  
卵博辯以僵尸談仁義其可樂視所履而舛馳儼衣冠  
於民上為賈豎之不為方滔滔以皆是奚一木之足悲

貧女賦

有序

元

吳萊

予春秋二十有二嘗偃蹇不得志因讀史記感甘茂貧女分輝鄰燭之語故作是賦以廣之

伊大鈎之塊北兮敷動植於八紘茲女蹇其居貧兮乃困苦而不得生惟室家之蕭索兮屬多難之來并空展轉其寤寐兮魂惕惕如有驚顧儋石之不儲兮支牆屋之敝傾印鼠跡於床塵兮網蛛絲於門楹胡藍縷而不完兮又機杼之無聲凜寒風之中人兮感促織之宵鳴

拂敗奩之殘蠹兮舊鏡黯以羞明銅釵折其半股兮亂  
髮鬢之縱橫拈竹筐之素縷兮箴欲澀而不行亦何心  
於組紉兮況鴛鴦之能成挾故絮以假寐兮耿寒燄於  
孤檠誰哀吾之窈窕兮幸自保其堅貞嗟父母之鞠我  
兮美裳衣而藏匿矧櫛風而沐雨兮身乃罹於荆棘忍  
須臾於溝壑兮豈敢休乎蠶織欲一銜其盛年兮縱粉  
黛而無色羌鑽穴與踰垣兮謂善淫之為惑庶容德之  
可全兮雖凍餒其奚卹彼鄰姬之纖巧兮日靚粧以登

樓綴木難之充耳兮插翡翠之搔頭騁茲心之妖冶兮  
學趙舞與齊謳佩階蘭以求媚兮祇怨曠之懷憂信怙  
寵以取樂兮盡夙夜於衾裯飛瓊觴以嬌醉兮秉銀燭  
而歡遊恨兀兀以獨處兮欲從汝以為謀細娛聿其可  
翫兮重桑濮之貽羞寫予心於溝水兮恐年華之遲暮  
甘蓬葆而不恥兮豈蛾眉之見妒且絕世而特立兮逮  
傾城而弗寤迺憔悴之或棄兮縱效顰而罔顧紛采彼  
之柔桑兮輕擲金於行路苟力操乎井臼兮微隱德吾



誰慕繫二南之發政兮由夫婦之所推化尚及於草木  
兮獨不撫乎娉嫫利遺秉與滯穗兮豈年登而啼飢儻  
卒歲之無褐兮何功裘之足為慨茲道之愈遠兮指古  
人以為期聊援瑟而一鼓兮遂聲之以為詩詩曰有美  
一人兮東鄰子耀金珠兮列紈綺弄姿飾鬢兮匪桃伊  
李朝為春風兮暮則流水曰妍曰醜兮云誰之使見肘  
決踵兮我樂乎此樂吾之樂兮勿傷吾貧寵之一失兮  
金屋生塵固榮豔之匪望兮又何必怨夫陽春

起病鶴賦

有序

元  
吳 萊

予少多病嘗作病鶴賦以自況蓋言訥然如不出口身退然如不勝衣後雖稍自振於時亦不克也然其稿已不存矣嗚呼予病久且痼其尚可以未起乎起之在我而已於是復作起病鶴賦并以示知我者

伊玄造之播物有九皋之靈禽稟幽心於藻質散縞翅與玄衿倚嵩丘之石室瞰蓬島之清潄眇八紘於一舉曠千里之遙臨然而山多歲陰野積冰雪老松無柯百

草肅殺圓吭塞暗弱脛摧折赤精眊昏纖趾蹇躡胡志  
向之殊卑尚光儀之迴潔匿平林而羃迷壓巨壑之訝  
裂是以前瞻愾怵後顧褻褻投蹤灌木憩影沙坻靜非  
馴擾動若羃羃徘徊蕭索躑躅險巖奈世氛之混濁憶  
天路之孤危望鴻鵠而不及慙燕雀之陵欺俯爭枝於  
斥鷃遠絕軌於長離顧雲海之日隔窘稻梁之恒飢幸  
樊籠之匪觸豈矰繳之來施亦何恙之不已迺歷年而  
留茲至若高步自怡嘯呼同侶拉颯思奮踉蹌起舞風

生則虛曠露隕則淒楚拊青田之故巢睨華表之遺柱  
夷采薇於巖谷憲含糗於環堵駟蹇剝而罕逢鴻激亢  
以多忤唏胎化之尚然睠帝鄉而延佇抗衆彙而不羣  
懼終身之畸旅於是韜養既久栖峙載寧土木內蓄火  
金外形梳理碎玉剷除殘腥羨門許其彳亍玄俗惜其  
竚竚擿武丁之寓篆發緱嶺之藏經服仙人之上乘擁  
太古之遐齡故能一洗塵滓直遡寥廓仰拂紫宮迴翔  
金閣過夷羊於南維窺壁壘於北落濯長河之奔流凌

倒景之照燭導素蜺之飄揚撓鶉鳥以距攫躔建木之  
絕標躋神芝之奇藥然後希一真而永固超無極而磅  
礴曰復予之本初竟誰辨其所至之垠堦惟天地之一  
指忽古今之紛更人何窮而不達物何悴而不榮將人  
物之多變豈禽鳥之異情苟相時而能動雖處困而必  
亨是故邦治身出身顯道行奉周廬於旦夕視萬乘若  
友生負文章之綺麗馳論議之崇竑一賜則明珠白璧  
再寵則三事九卿方解茲之舊繫庶息我之前黥可無

心於祿位終不日而蜚鳴大舜來鳳於樂奏宣尼致麟  
於文成聊援毫而興起又孰不仰德而聞聲

葯房賦

明王禕

夫何美人之練要兮蹇好修以為常既昭質之弗虧兮  
又姱節之孔彰爰托物以自表兮曰清修之是將滋幽  
蘭而樹蕙兮蘭為佩而蕙為纓褰薜荔以為衣兮集芙蓉  
以為裳既所服之孔修兮粲芬芬其文章所處欲其  
芳華兮又申之以葯房何斯房之結構兮獨以葯而為


之薦芳馨之菲菲兮絢繁飾以陸離文杏煥以成梁兮  
琢辛夷而為楣櫟木蘭之差差兮栒文藻其紛披繚疏  
牖以杜衡兮扈素壁以江離桂樹鬱其當軒兮陰團團  
而成帷陳百草為庭實兮肆把翫乎瓊枝襲芸編以總  
總兮緼空桑之朱絲餐繁英與落蕊兮飲沆瀣以自怡  
澹逍遙以容與兮聊棲遲而偃仰撫榮華之未艾兮睠  
茲葍以自況維葍之澤兮所以示昭質之匪飾也維葍  
之馨兮所以表姱節之不忒也朝夕處乎斯房兮信修

潔之不忘苟所好之絕俗兮人不知其何傷方世俗之  
溷濁兮糝薰蕕而莫質蕭艾蔽乎中野兮菰菜羹其盈  
室彼惡櫟果何物兮亦雜然而充幃衆舍是而尚非兮  
孰於芳其能祇何美人之耿介兮乃獨為此度也夫豈  
傲世以自異兮亦惟好修之故也委厥美以自棄兮固  
非其心之所安也使矯名而無實兮又胡若是拳拳也  
顧余生之侘傺兮曾靡求乎安處塊獨守此敝廬兮蓬  
蒿紛其環堵雖凝塵之滿席兮情晏然猶冲豫外物一



無所徇兮曰惟德之為馨冀和順之中積兮致英華之  
外形徒潔修以自表兮媿非予之所能既好尚有不同  
兮又孰揆予之中情幸美人之嬋娟兮夙與予其目成  
欲相仍乎斯房兮恐莫堅乎芳盟命靈氛為予筮算兮  
靈氛告予以吉占曰外好雖不同兮實中情之可堅聞  
斯語以壹鬱兮恐佳期之遲莫思美人而未見兮悵盤  
桓而延竚將何物以結言兮悵衆芳之已萎采芳洲之  
杜若兮聊遺予之所思願相從而相羊兮終歲晏以為

期慮誓言之未固兮結微情以成詞



御定歷代賦彙卷一百十四